


秋

笳

集附錄

二





秋 笳 集

錄 附

(二)

吳兆騫撰

王雲五主編
叢書集成初編

秋 笈 集
附二 錄冊

中華民國二十四年十二月初版

平

撰者 吳 兆 騫

發行人 王 雲 五
上海河南路

印刷所 商務印書館
上海河南路

發行所 商務印書館
上海及各埠

秋笳集西曹雜詩卷四

詩三

兆鵞邱樊幼生。菰蘆下土。弱齡有意。總角知名。才愧臨川。蚤擅芙蓉之譽。年同僧孺。卽傳芍藥之篇。漢代三君。長其聲價。江東二俊。許以追攀。旣而擢秀藝林。含毫鎖院。自慚庸薄。猥簪賢良。江頭艤榜。京尹問孝廉之船。道上鳴鑼。君王命上計之吏。豈知新粧始竟。便嫉揚蛾。嘉卉初繁。遽逢鳴鳩。孝子有掇蜂之懼。賢人生市虎之悲。直比朱絲。乃見嫌於曲木。貞如白璧。忽致嘆於緇塵。成是南箕。構茲北寺。江文通之就吏。傷心謗缺之間。范孟博之拘囚。慷慨棘木之下。夏臺日暗。疇惜賢豪。貫索星高。竟災文士。望慈闈於天際。白髮雙悲。憶少婦於樓中。紅顏獨倚。絀冤情而莫訴。抱幽憤以誰知。嗚咽銀箏。空寄思鄉之調。淒涼石闕。難傳羈客之情。爰寄托於篇章。聊自陳其胸臆。南冠琴曲。泣鍾儀之土風。西陸蟬聲。庶略丞之慨咏。詩成雜體。情比四愁云爾。

戊戌三月九日自禮部被逮赴刑部口占二律

倉黃荷索出春官。撲目風沙掩淚看。自許文章堪報主。那知羅網已摧肝。冤如精衛悲難盡。哀比啼鵑血未乾。若道叩心天變色。應教六月見霜寒。

庭樹蕭蕭暮景昏。那堪縲紲赴圓門。銜冤已分關三木。無罪何人叫九關。腸斷難收廣武哭。心酸空訴鵲亭魂。應知聖澤如天大。白日還能炤覆盤。

四月四日就訊刑部江南司命題限韻立成

自嘆無辜繫鸛鳩。丹心欲訴淚先流。才名夙昔高江左。謠詠於今泣楚囚。闕下鳴雞應痛哭。市中成虎自堪愁。聖朝雨露知無限。願使冤人遂首邱。

感懷詩八首呈家大人

棘寺陰沈樹色長。故園何處淚沾裳。獨憐積毀能銷骨。無那含冤易斷腸。授簡圓扉思夏勝。上書梁獄泣鄒陽。金門咫尺招賢地。不得雄文達建章。風塵日夕滿燕山。馬角烏頭尚未還。夢繞高堂憐白首。書來香閣泣紅顏。淒涼鈴柝悲風外。黯淡松楸落炤間。極目南雲何處是。羈心一夜度江關。寂坐匡牀引濁醪。臨風愁聽角聲高。謗書何事騰三篋。壯士由來泣二桃。目斷鄉關空涕泗。心傷烏鳥自悲號。可憐一片江南月。永夜蒼蒼客夢勞。涼風吹雨夜窗虛。木索嬰身獨起居。豈有姓名藏複壁。可憐涕淚滴衣裾。初明歸思通天表。孝穆哀情僕射書。惆悵慈幃新白髮。側身南望一愁予。

懷牆寂歷鎖莓苔。兀坐槐陰迴自哀。飛雪漫傳鄒衍恨。凌雲誰惜馬卿才。異鄉節物愁中度。舊國烟花夢

裏迴。何日烏啼傳大赦。秋風重接故人杯。
青青杜若滿芳洲。迴首家山憶昔遊。父子文章推二庾。弟兄才筆說諸劉。那知眉黛悲謠詠。還使衣冠泣
纍囚。聞道江東花信好。五湖歸去看漁舟。
長吹玉笛到雞鳴。讀罷魚書泪滿纓。千里關河風雨恨。一堂兄妹歲時情。板輿奉母嗟潘令。鱸膾思鄉有
步兵。折盡柳條歸未得。中宵腸斷闔廬城。
殷勤尺素勸加餐。強引清尊且自寬。伏闕何人懷白璧。當門從古忌芳蘭。山頭晞髮孫登嘯。軍府彈琴楚
客冠。見說九重多雨露。擬披雲霧叩鴛鸞。

聞有家信遂成

遙傳江上信。八月到燕京。故國經年別。鄉書萬里情。秋雲低驛樹。夕照下關城。極目天涯外。蕭蕭旅雁鳴。
寄內二律

憶汝深閨裏。淒涼畫閣塵。有情憐蕩子。無語向尊親。明鏡雲鬟亂。芳襟玉筍新。迢迢今夜月。愁殺兩鄉人。
薊北秋偏早。江東客未歸。不知更歲序。長自泣羅衣。砧杵霜華溼。星河雁影稀。西窗明月在。腸斷是鴛機。
偶成二律

高秋寒氣迴。延眺獨傷心。欲餉秦嘉鏡。難爲莊鳥吟。客愁千里外。鄉夢五湖陰。苦憶登臨處。迢迢不可尋。
一自辭鄉國。漂搖類轉蓬。刀環徒有約。尊酒竟誰同。風急催寒角。霜空度早鴻。遙憐潞河水。千折到江東。

秋夜寄計甫草

槐樹沈沈鼓角催。愁看清露滿荒苔。金風入樹秋陰薄。璧月臨窗夜色來。獻賦未知聖主意。行吟還使故人哀。天邊鴻雁南飛急。悵望江南首重回。余部訊詩七月廿六日已呈御覽故有獻賦未知聖主意之句。

答贈丁繡夫二首

獨棹孤舟慘別顏。夢魂終日繞吳關。春來無限新楊柳。惆悵東風不忍攀。

昨歲昌亭酒。相攜向碧潯。誰憐一失所。惜別到如今。星漢三秋隔。風霜五夜深。傷心看候雁。何處寄歸音。

寄懷袁文生黃平子二子

二子今名彥。相逢意自親。金鞭曾試馬。羅袂共留賓。薊北雲沙暗。江東花鳥新。那堪思往事。回首欲沾巾。

有感三律次陳子長韻

燕山秋望迴。霜露晚來多。直道原如此。吾生可奈何。天寒驚歲序。親老泣風波。却憶談經日。淒涼橫笛歌。深秋西署冷。兀坐意悲哉。笑傲應憐我。艱難孰愛才。異鄉嗟客久。故國少書來。不作窮途哭。誰知阮籍哀。欲盡平生語。艱辛敢自陳。已成鉤黨禍。莫忌獨醒人。名辱憐詞賦。時危聽鬼神。君門真萬里。流慟向青旻。

送人還江南

八月霜清木葉催。天涯惜別帝城隈。風塵作客三秋暮。鄉土驚心萬里迴。東府山川天闕近。南徐潮汐大江來。故園橘柚垂垂發。滿目商飈迴自哀。

送姚子上還荊州

御苑秋高樹色微。送君擁傳出王畿。青蘋風急催征棹。白雁霜清炤客衣。山接虎牙寒峽險。江連鶻尾暮潮歸。却憐憔悴幽州客。矯首空嗟兩地違。

九日同陳子長飲分韻得十五刪

太息今年重九日。羈棲無處望秋山。寒花炤眼傷遲暮。白雁低空獨往還。西署漫傳燕市酒。南冠頻泣楚臣顏。最憐舊日登高地。碧嶂丹楓未可攀。

卽席再用前韻答贈子長

北風驅雁度燕山。落日頽垣炤客顏。豈有絳囊傳令節。漫因黃菊憶鄉關。陳遵意氣誰堪並。沈炯漂零尙未還。無那少年俱落魄。祗應潦倒酒徒間。

再和子長

禁城秋晚雨如絲。把酒荒臺感歲時。已見清霜催旅鬢。那堪斜日上花枝。曲中風土羈臣淚。笛裏關山客子悲。莫道舊游星散盡。比來傾蓋愧君知。

感寄

荒庭獨坐起悲歌。抱病誰憐在網羅。歲晚冰霜生白髮。秋來書札阻黃河。李膺賓客飄零久。庾信文章涕淚多。忽憶去年高會日。紗絳絲管正婆娑。

夜坐東陳子長

明河如練俯城頭。節序驚心迴獨愁。月色遠連吳苑樹。角聲寒動薊門秋。鄉心萬里隨鴻雁。旅病經年繫鵝鳩。惆悵逢君多難後。不堪重說五陵游。

白頭宮女行

長安女尼妙音者。本崇禎時舊宮人。後出居民間。祝髮於北城之佛舍。與海昌相國居址接近。常出入相國家。述甲申三月及宮中舊事甚悉。又言宮中侍姬。都以青紗幕外約釵梁。自遭喪亂。香奩寶鈿。悉爲人奪。惟存青紗數幅。猶昭陽故物也。今年戊戌。予以謗議械繫都官。而相國亦以他事下吏。因與其嗣君直方子長相見。酒酣耳熱。爲言妙音。予旣自傷讒枉。復聞妙音之事。悲紅粉之飄零。感羈人之淪落。乃連綴其詞。作爲長歌。以傳於樂府爾。

長安女冠頭似雪。曳地黃絁懸百結。手執金經淚暗垂。云是前朝舊宮妾。一朝充選入披香。倭墮新梳內殿妝。低鬟自惜青蟲小。繁臂愁看絳縷長。當年御極方清晏。宮中屢啓催花宴。雲母屏開見舞人。水晶簾捲低歌扇。歌舞年年樂事殊。森沈寶幄挂流蘇。北宮漫閱魚龍戲。東絹頻臨蛺蝶圖。圖史紛披間珠翠。深宮鎮日長無事。鵲顧書從女史傳。鸞雛釵向昭儀賜。昭儀明艷獨承權。促坐金牀倚笑看。燈簇九微長侍輦。粧成七寶自凭闌。闌前羅綺紛成列。阿監才人幾分別。玉墀草細打毬高。珠箔花深吹管徹。景福宮前細柳垂。瓊軒不閉共追隨。繡鐙纏髮嬌試馬。綠綈隱几倦彈碁。春花秋月年華換。掖庭寂寞腸堪斷。素手

繡書教小王。紅顏對食憐同伴。漢宮中自相配偶。謂爲對食。自從羽檄擾秦川。遂使官家少晏眠。五夜刺
閨頻報警。三春合殿罷開筵。幾載天顏慘不樂。中宵獨坐占芒角。燄火新開內教場。詔書屢下文淵閣。闕
門封事日紛紛。督撫潼關復覆軍。幾部黃巾殘豫楚。千羣青犢下宣雲。宣雲處處名城墮。倒戈自啟居庸
鎖。關下交馳告急書。殿前望斷平安火。軍鋒倏忽逼神京。一夜都人已數驚。內苑左貂羣搦盜。圍營飛騎
半翻城。城上弓刀爭內向。蒼茫無復蓬萊仗。獨御金鞭視九門。空頒鐵券封諸將。白馬青袍捲地來。君王
長嘆下平臺。口詔內人從避寇。手持愛子共銜哀。可憐十葉漢天子。海竭山崩竟如此。複壁甯教伏后藏。
佩刀自刺清河死。珠傷玉碎滿曾成。宮車無那亦龍迎。猶有黃門曾殉主。豈知紫闥竟屯兵。自憐白首深
宮住。欲問家山渺歸路。潛脫霓裳出九重。却尋月徑依雙樹。一托香臺已十秋。每談遺事自生愁。室中漫
禮金仙席。夢裏還隨玉輦遊。惆悵生年遘陽九。戒珠持遍甘衰朽。仙家龍種尙飄零。賤妾蛾眉亦何有。我
來故國幾沾翰。摩娑銅狄北風酸。昭陽舊侍悲通德。長樂姬人識佩蘭。從古存亡堪太息。淒涼無處尋遺
跡。麥秀偏傷過客情。柘枝還下宮人泣。

秋雁篇

長安八月金風起。旅雁飛飛度龍水。共道連翩傍九霄。甯知迢遞經千里。千里隨陽道路賒。揚聲接翼向
天涯。銜蘆欲避金河雪。唼藻還依玉渚沙。沙頭日暮秋蕭索。夜火如星亂棲泊。江路由來足稻梁。雲間却
自多憎織。憎織連天何處飛。冰霜滿目未能歸。月冷關城哀響過。風迴汀渚斷行稀。可憐歲晚爭飛急。羽

翻摧頽去安極。拂霧宵傳紫塞書。驚寒曉雜朱樓笛。誰家少婦倚朱樓。忽見孤鴻淚暗流。玳瑁牀空紅粉怨。茱萸帶緩翠娥愁。愁心幾度音塵絕。擣盡寒衣向秋月。詎憐明鏡歇容華。却恨狂夫限城闕。城闕遙遙落雁低。青蘋碧石五湖西。何如長住吳江渚。不使年年有別離。

冬日同子長賦限韻立成

歲晚驅征雁。時窮泣鮒魚。漫憐同難久。還憶結交初。越石原無罪。文通未上書。白雲空在眼。腸斷望鄉餘。冬夜同諸子飲方坦庵先生齋卽席賦呈

月落層城雁度哀。南冠相對暫銜杯。天涯兄弟情偏苦。江表山川夢未迴。穿徑已荒庾信宅。思家莫上李陵臺。夜深何處吹羌笛。腸斷鄉關是落梅。

夜同子長過方婁岡學士賦贈

絳蠟沈沈炤眼紅。冰天歷歷度飛鴻。披帷莫厭經過密。把酒應憐患難同。夾巷鼓笳喧北寺。中宵星斗動西風。十年冠劍銅龍署。回首君門歎轉蓬。

送張繡虎南行和陳相國

經年西署相依久。忽送征車恨若何。嚴譴已嗟同放逐。餘生那更歷風波。新亭樹色臨江盡。京口濤聲到海多。萬里故鄉猶在眼。憐君重得暫經過。

戊戌除夕偕諸子集陳素庵先生齋卽席同直方子長賦

促漏催寒盡。官梅逼歲新。不堪今夜酒。相對異州人。竄逐存餘齒。艱難愧此身。傷心瞻北斗。明日帝城春。

己亥正月朔夜同子長小飲口占

條風淑景動皇州。孤客相逢尙滯留。萬里共傷多難日。三春誰記少年游。姓名讒枉悲青史。門次凋殘累白頭。遙夜思歸不成寐。角聲吹徹五更愁。

人日同子長賦

支離棘寺逢人日。強進芳尊倍愴神。鳳闕綵花稀到眼。龍沙遷客自相親。人遙南國書難寄。律轉東郊柳漫新。忽憶去年偕計吏。正驅鞍馬大河濱。

答贈陳子長

驚座聞名久。相逢卽故知。片言深契托。九折共艱危。伏闕書難上。懷鄉調自悲。帝城春色早。腸斷向南枝。

正月九日同子長望月

客心愁不寐。坐見月華移。只自臨遙夜。甯知異舊時。光連關樹迴。寒入苑鐘悲。遠憶金閨婦。顰蛾恨別離。

元夕同直方子長賦

寂寞圓牆少客過。聽殘更漏復如何。自將杯酒酬佳節。不爲艱虞廢嘯歌。月繞庭柯春色靜。風傳城角夜聲多。遙憐燈火千門裏。繹繹雕輪度玉河。

春雪篇

此予童時所作也。今年浮繫西曹，見積雪綿旬，凝堦不散，因記憶錄出，以正素庵先生。然語多忘失，復爲點翰，以視向製，略更四五矣。先生及直方子長，皆爲屬和，遂併記之。

元飈吹不已，一夜起嚴陰。漸覺輕寒侵曉幕，俄驚飄霰逼春林。林端騁望光如曙，六出霏霏挺瓊樹。祗道尋芳鳳苑春，誰知吹雪龍山暮。龍山雪色舞空來，沾花拂柳自徘徊。金屏夜掩疑含月，綺戶晨開悞落梅。誰家小院湘簾溼，幾處高樓羌笛哀。數聲羌笛天如練，珠斗年光君不見。積聚遙含翡翠窗，凝暉深炤鴛鴦殿。鴛鴦殿裏耐春寒，少女粧成自倚闌。歌扇半遮憐粉薄，舞衣乍點惜花殘。海神昨日車輪度，雪花落盡長安路。玉房密坐進蘭尊，繡被薰爐分桂炷。桂炷沈沈樂未央，可憐春色半飄颻。剪成綵勝無顏色，夢繞梨花總斷腸。梨花匝樹春歸蚤，鱗亂空階愁不掃。班女何須怨白團，王孫空自思芳草。草色淒迷紫陌曛，那堪飛雪正紛紛。三時花月知何處，千里瓊瑤祗憶君。瓊瑤滿眼難凭折，黃竹哀歌自淒咽。已悲搖蕩任迴風，誰惜飄零在韶月。春晴日莫嘆蹉跎，白雪漫天可奈何。惟有東瀛雙玉馬，庭前依舊散陽和。

感示子長

夜靜危譙刻漏頻，客中對爾倍情親。非關刀筆嚴持法，自是聲名解悞人。獻弔湘潭悲宋玉，竄身遼海泣崔駟。南天望處堪腸斷，榆柳江皋已暮春。

閏三月朔日將赴遼左留別吳中諸故人

前月三月卯甚近，玉關遷客肝腸絕。結束征車去舊鄉，矯首天南恨離別。憶昨胥臺事俠遊，才名卓犖凌

王侯黃童雅擅無雙譽。溫嶠羞居第二流。相將日向春江曲。闔廬墓前草初綠。綵鷁春風客似雲。珠簾夜月人如玉。少年行樂恣游盤。夾道飛花覆錦湍。按歌每挾茱萸女。駐馬頻看芍藥欄。筵前進酒題鸚鵡。一日聲名動東府。擬從執戟奏甘泉。恥學吾邱能格五。去年謬應公車徵。駿馬高臺幾度登。自許文章飛白鳳。豈知謠詠信蒼蠅。蒼蠅點白由來事。薏苡偏嗟羅謗議。賦就凌雲祗自憐。投人明月還相棄。身嬰木索入園門。白日陰沈欲斷魂。北燕漫說騶生哭。東海誰明孝婦冤。銜冤狂狴悲何極。慷慨陳詞對巖棘。幽怨空教托楚辭。嚴威竟已口秦格。忽承恩譴度龍沙。邊草茫茫去路賒。名列丹書難指罪。身投青海已無家。銷魂橋畔誰相送。一曲蘆笳自悲痛。阜帽慚非避世人。青山何處思鄉夢。鄉心日夜繞江干。江柳江花不復攀。萬重關塞行應遍。十載交游見欲難。從此家山等飛藿。滿眼黃雲橫大漠。自傷亭伯遠投荒。却悔平原輕赴洛。一向冰天逐雁臣。東風揮手淚沾巾。只應一片江南月。流照飄零塞北人。

秋笳前集卷五

詩四

春日篇

亭皋三月東風吹。匝道烟花豔綠圍。十里紅潮連翠岸。千重碧樹起珠帷。侯家別墅春如織。芳林繁囿連雲日。蘭沼輕波泛紫鴛。蕙樓高影巢元鳥。樓陰架址碧嵯峨。窗戶玲瓏盛綺羅。日映翡翠帷銀蒜。靜風微珠綴玉鈴和。鈴聲隱隱花間起。榆錢雪落覆明水。數蝶低飛香草中。流鶯細囀垂楊裏。氍毹垂楊滿碧郊。遊絲百尺亂烟條。陌上繁陰臨玉道。隄邊香霧鎖虹橋。虹橋一望明于素。朱軒紺幘紛相度。錦障新開灞水園。羊車近出長安路。長安此日正妍華。幾處樓臺映晚霞。翠幘香細初調馬。繡袷風輕試問花。綠疇去芳埃逐。油幕生光照平陸。帶織茱萸耀紫珊。鞍裝杏葉團紅玉。玉鞭時向狹斜行。弱絮繽紛綴道傍。鬬雞坊裏花初滿。走馬臺邊柳正黃。柳黃花滿相凌亂。由來此地稱華豔。日暮徵歌趙李家。夜來貰酒胡姬館。十五胡姬不解羞。低鬟輕倚鈿篋篋。私結紅羅邀上客。自矜脂腕整搔頭。年年歲歲爭遊冶。挾彈探丸空蕩野。南陌方看千騎來。東皇又擲三春謝。三春風日自陰濃。落盡梨花鎖院中。聞道西園芳草路。羅衣迎暑送春風。

金陵篇

高皇昔日起西吳。手挾靈旗問獨夫。既向龍沙開絕漠。遂來虎踞建神都。燕子二潮通海浪。鴻郎萬雉俯江波。江波去去無窮已。城中宮閣參天起。鵲鵲連延抗碧臺。鳳皇窈窕圍玫瑰。隱隱長橋水臥虹。沈沈華闕霞含紫。圓井春寒露索高。上林花隱風弦細。蘭鐙鈎陳七寶鞭。深深紫袖寫便嬾。畫靜烟花金殿杳。宵嚴鐘鼓玉珂寒。七校隊齊仙仗外。羣公珮響翠華前。日麗朱城百萬戶。氣迫皇圖三十年。文皇爲念邊城苦。欲臥燕山留北鎖。竟從鹿輅策關中。難仍牛首稱天府。一自宸旒去紫臺。遂令南內瑱青槐。玉女窗寒風斷續。景陽鐘歇月徘徊。銅溝不膩紅粧粉。金屋空餘烏韭苔。轆轤聲斷嘯鴉曉。宮莎含日春秋早。獸環深閉寂難知。鈎盾蕭涼無復掃。時見朱櫻薦寢園。獨看碧草蕪馳道。列聖相傳海內平。侯家甲第起紅塵。十二重樓連鳳翼。三千複帳結鴻紛。香車半罨油幢暖。畫閣全傳水調清。舞愛弓腰碧纈轉。歌殘子夜玉鈎明。繡戶宵籠雲母扇。晶盤曉進月兒羹。既傾燕尾臨芳沼。還問桃根向石城。石城年少如鷹撇。腰下吳鈎凝紺雪。挾妓酣歌玳瑁樓。揮鞭驕試金錢埒。檀槽撥軟貼龍香。紵弦絲斷施鸞血。獨來陌上恣矜趨。放犬呼鷹樂未消。醉拭芙蓉輕一諾。笑擲珊瑚賭百驍。絳衫香襲浮雲鞞。紫艾光承明月刀。明月高高照芳甸。秦淮宛轉澄如練。汀上銀沙寫露華。堤邊珍樹吹花霰。錦纜風迴榜唱微。蘭橈波細簫聲轉。簫笳清吹滿皇州。夾道芳塵掩畫樓。睡鴨香濃初按茜。鳴蟬梳罷學藏鉤。街喧蘭葉迎珠勒。隊簇桃花映綠鞦。綠鞦珠勒紛馳逐。誰知禍亂來相促。九逸驚從代邸來。三星更向東山簇。江表雖飛晉氏龍。中原已失嬴家鹿。